

四庫全書

史部

欽定四庫全書

史部

國朝宮史卷二十三

詳校官編修臣溫汝适

編修臣程嘉謨覆勘

總校官進士臣朱鈴

校對官中書臣宋枋遠

謄錄監生臣朱上林

欽定四庫全書

國朝宮史卷二十二

書籍

宮史志書籍垂

法守也古者延閣廣內之藏著為書目惟是使者所
求寫官所錄秘書省官庫所積取足薈古今資掌
故已爾我

朝文治光昭藏書之富冠於往代

內府所貯圖書具於天祿琳琅東壁琅函諸編者
彪炳美富無煩載述惟是

聖聖相承大文彌耀

世祖章皇帝制作昭明垂光冊府微言大義炳若日星
聖祖仁皇帝契苞符之秘鑰探洙泗之淵源六十一年
中性道文章廣大悉備

世宗憲皇帝篤志紹庭單心宥密仰羹牆而見道守精
一以執中謨訓煌煌光於

前烈焉

皇上以內聖外王之學發為垂世立教之文言根至
道事紀殊勲真足同天地之幃載朗羲娥之照

燭者矣

臣

等敬謹編次釐為十有六類首登

實錄以彰

功德之原次紀

訓諭以昭

詒謀之大於

御製仰

聖學之高深於

方畧述成功之懿鑠若夫表章六經釐定諸史靈臺
占筮之學職方益地之圖有典有則厥並懋焉
至於纂言有要用示

訓行載道者文聿標準則類書極載籍之博字學播同
文之庥與凡儲珍

秘殿著錄石渠壽官局之棗梨勒琅函之金石者

煥乎咸具大觀焉已綜而錄之皆

列朝心傳之要手定之書

聖作明述以為出治之本者而非如劉畧班藝以下徒
侈網羅古籍蒐輯舊文無關政理者比也其竺
乘梵文統於三藏貯之淨境者咸不列於是編
書籍一

實錄

太祖高皇帝實錄一部

崇德元年十一月

太宗文皇帝命儒臣恭纂康熙二十一年十月

聖祖仁皇帝命重修書成凡十卷雍正十二年十一月

世宗憲皇帝命加校訂

皇上御製序 粵稽自古帝王乘時建極膺天命而

佑下民豐功駿烈垂諸史乘炳炳麟麟是以紀言

紀事必詳且核焉況於聖人首出開物成務經緯

天地奠麗河山智勇沉深謨猷訏遠布為法則著

為章程將使後世子孫繼繼承承遵循罔軼詎不
重與洪惟

太祖承天廣運聖德神功肇紀立極仁孝睿武端毅欽
安弘文定業高皇帝以聖神文武之姿受

天眷命誕興東土爰總義旅通求厥寧九國連兵相向
一怒而討平之明人四路來攻亦尅日盡殲於境
外師出有名光明俊偉威愛並立近服遠懷當是
時羣部來歸英豪響附奮迹遼瀋之間而號令行

於萬里帝業之興何其神也由是天人協應建國
紀元修明庶政教育羣倫創國書分旗制申軍令
定禮儀經營締造之際旰食宵衣不遑暇逸故乃
網舉目張傳之億萬年而不可易心法治法與二
帝三王有同揆也

太宗文皇帝繼天登阼命儒臣敬輯

實錄規模畧備

聖祖仁皇帝復加蒐考修纂成書尊藏內府並貯史歲

惟是山川疆土以及臣僚名氏前後間有異同清
漢之文或簡或繁未經畫一我

皇考世宗憲皇帝懼有舛訛特開史館重加校訂按日
進呈

親為閱定朕纘承丕緒仰體

前徽用復潔誠披覽卷帙如舊繕錄一新祇祇乎覲開
國之鴻模昭垂統之大業書曰監于先王成憲其
永無愆詩曰昭茲來許繩其祖武於以率攸行而

保

天祐其敢忘紹庭上下之思哉謹序

太宗文皇帝實錄一部

順治九年正月

世祖章皇帝命儒臣恭纂書成凡六十五卷康熙六年

十一月

聖祖仁皇帝命恭校十二年七月

命重修雍正十二年十一月

世宗憲皇帝命加校訂

皇上御製序 洪惟

太宗應天興國弘德彰武寬溫仁聖睿孝敬敏昭定隆
道顯功文皇帝徇齊敦敏廣大寬仁早從

太祖贊襄大業才德冠世中外歸忱迨乎嗣統之年敦
宗睦族戢衆安民御將行師開疆拓土軍威震疊
而以不嗜殺為心武功赫濯而以善養人為務存
朝鮮故土字蒙古遺氓明政不綱天人共憤且舊

與我國有隙於是應天順人率師直抵燕京聲罪
致討猶念彼為中國功垂成而弗取天性仁厚大
度豁如固已超越百王包涵六合矣至若建官分
職推賢舉能愷澤麗鴻刑章平允設制科以崇文
教開言路以重忠良隆規鉅典巍乎煥乎皆一統
之大猷百世之良矩也

世祖章皇帝輯為

實錄六十有五卷

聖祖仁皇帝命儒臣蒐討訂正繕錄成編尊藏惟慎

皇考世宗憲皇帝孝切崇

先敬加披覽以前後字句之未盡畫一也復令臣工校

對而

躬為閱定焉朕仰承遺志莊誦繹思用竣厥事緬惟帝

典商盤前王之懿範也天球琬琰宗廟之重器也

昔之君珍為世寶奉以無墜矧夫典章所紀謨烈

所垂造邦制治之圖啟泰貽安之要煌煌簡冊世

昭法守何止帝典商盤天球琬琰之寶重也耶謹

序

世祖章皇帝實錄一部

康熙六年九月

聖祖仁皇帝命儒臣恭纂十一年書成凡一百四十六

卷雍正十二年十一月

世宗憲皇帝命加校訂

皇上御製序 我國家受

天眷命統一萬邦日月所照血氣之屬咸切尊親亦惟
是小心翼翼之忱有以通

帝載而昭來許故乃朝廷官府之政罔不參稽古訓溥
協人心制定於一時而慮周乎萬世重熙累洽至
於今茲海隅蒼生穆然想見盛德信乎開國之規
模詒謀遠而流澤長也洪惟

世祖體天隆運定統建極英睿欽文顯武大德弘功至
仁純孝章皇帝神靈天亶冲齡踐阼紹我

太祖

太宗丕緒懋建大猷勤思上理當是時流賊已入京師
明祚已成板蕩遂因明將吳三桂之請命將士入
關定燕京殄羣寇挈斯民於水火之中而登之衽
席之上爰主

郊禋式頒正朔自古得天下之正未之有比也政令彰
施百度具舉滌前代之煩苛沛興朝之膏澤治化
翔洽達乎四表由是制禮作樂敷教明刑虛已以

尚賢推誠以納誨斟酌損益秉至中而時措之著
為謨訓載在簡編皇哉唐哉子孫世世守之以成
久安長治之業於是乎在康熙十一年

聖祖仁皇帝特開史館纂輯

實錄凡一百四十六卷雍正十二年

皇考世宗憲皇帝恭閱全書復令儒臣重加校訂事未
竣而

龍馭上賓朕哀戚之餘飭令陸續進呈敬加披覽嗚呼

觀

世祖

聖祖經綸之鉅典則知創業之甚難念

世宗繼述之深衷則知守成之不易方策可傳者紀綱
之成軌夙夜罔間者兢業之一心敢弗繹思而敬
承之以迓

上天無疆之休則是書也誠致治之權輿萬世之鴻寶
矣謹序

聖祖仁皇帝實錄一部

康熙六十一年十二月

世宗憲皇帝御製序 粵稽古載籍以來聖帝明王德
隆業茂莫不揚休紀美照耀簡編若夫

上天純佑下民聚扶輿積厚之氣篤生

至聖備道德之崇廣集皇王之大成經綸宇宙彪炳帝
紀巍巍乎蕩蕩乎自羲軒至今未有如我

皇考聖祖仁皇帝之盛者也洪惟

太祖

太宗肇構鴻基發祥垂裕

世祖開天建極統一寰區暨我

皇考天亶神靈丕承

先烈以徇齊敦敏之質而學有緝熙以繼體守成之時
而事兼開創以光華格被之勲而日新盛德以邳隆
熙洽之運而時勅幾康

臨御寶祚六十餘年歷服縣長超越千古仁漸義摩文

經武緯典章大備聲教覃敷峻德崇功蟠天際地有
如敬

天稟昭事之誠尊

祖切覲天之志

郊壇裡祀歲必躬親

廟享薦馨心虔對越用致

蒼穹之昭格聿彰

謨烈之顯承奉事

兩宮尊養備極承歡致敬閱數十年巡幸則躬扶
鸞輅侍疾則步禱

南郊送龍輜而親行瞻

寢園而灑淚自古天子之孝莫與比隆友愛裕親王等
垂老靡間視疾臨喪恩禮交至推仁宗室教育天潢
展親惇族誼莫厚焉宵衣旰食明目達聰

親政六十餘年夙夜勵精始終惟一

臨軒召對虛已求言數陳有益於民生必蒙採錄廉能

實見諸治效立荷

寵褒耆舊而體貌優崇簡俊又而程材器使小康大
法百僚皆得其人綱舉目張庶司各修其職四方之
利弊周知萬里之情形洞燭愛民如子軫恤維殷普
樂利於農桑裕蓋藏於積貯偶遇水旱立沛恩施發
帑蠲租動以數百萬計即在屬國運粟賜糧視同一
體德洋恩溥故黎庶樂業中外阜康慎重刑章哀矜
庶獄每於奏讞明允之中施仁法外嚴寒停遣盛夏

弛刑大逆寬族誅叛人無孥戮如天好生之德洽於
民心欽恤之仁無以加矣

講幄弘開精研道要考六藝之折中抉性理之精義

宸翰則鸞迴鳳翥

天章則玉振金聲

御定諸書包涵萬有融貫百家緡帙瑤編充牣冊府生

知天縱莫名

聖學之高深加以重道尊師表章儒術

親詣闕里瞻拜加虔賜博士於五賢躋紫陽於十哲

訓飭多士敦崇實學加科廣額惠洽儒林壽考作人於
斯極盛

聖武布昭

神謨密運天戈所指立奏膚功平三逆收臺灣布爾尼
應期而授首鄂羅斯望風而請命

躬率六師三臨朔漠殲噶爾丹而藩服乂安

命將徂征長驅絕域復達賴喇嘛而西陲寧謐銷鋒灌

燧俾薄海內外永慶昇平厯念河防

親臨指授覽全河之形勢運疏淪之神功開中河築高
堰而淮黃底績東南獲衽席之安濬永定隄子牙而
漳滏順流畿甸享膏腴之利地平天成萬世永賴至
若

躬行節儉而大官服御務崇樸素之風

秉德謙冲而

徽號鴻名屢却廷臣之請

至誠不息而朝乾夕惕本行健以法天

聖敬日躋而肅廟離宮儼動容之中禮凡茲盛美莫罄
名言是以久道化成太和翔洽天庥滋至歲奏屢豐
戶樂盈寧人登仁壽自古未賓之國重譯踵至戴高
履厚莫不尊親

升遐之日自僻壤遐陬遠暨蠻夷荒服含生負氣之倫
感慟哀號如喪考妣羣臣恭擬

廟謚曰

聖曰

仁祇薦

祖號萬口一心允孚公論猗歟休哉至矣大矣朕纘承
鴻緒念切紹庭踐阼之初即簡命大臣等董率儒臣
開館纂修發金匱之秘藏稽綸言於政地表年繫日
敬謹編輯紀言紀事鉅細靡遺朕齊肅展禮親加詳
閱歷今九載敬成

聖祖仁皇帝實錄若干卷又於尊藏皇史宬外恭繕全

帙虔供几案時時展讀以遂朕數時繹思繼志述事
之意於戲帝載難名而歲功昭布日月之運行星辰
之經緯可以仰觀成象焉聖德難名而治法昭垂條
理之精詳規模之宏遠可以仰求成憲焉我

皇考參贊位育之神欽明精一之蘊雖非簡牒所能殫
述而

鴻謨駿業炳於紀載與天無極萬世勿諉後之紹作君
作師之任求治統道統之全者於是乎在敬弁言簡

端以昭示我子孫俾永永敬承於億萬世謹序

皇上御製序

皇祖聖祖仁皇帝臨御六十一年耿光大烈顯燦古今

積惠襲恩淪浹寰宇功德之盛具載

實錄垂千萬禩我

皇考世宗憲皇帝御製序文推本

上天孚佑下民

列祖垂裕後嗣篤生

至聖開邃古以來未有之盛業煌煌乎言之廣大精密
至矣蔑以加矣予小子寅承丕緒紹聞衣德兢兢
業業仰思繼述

皇祖

皇考成憲日於治事之先展誦

列祖實錄周而復始

皇祖實錄卷帙浩繁排日敬覽寒暑靡間至自今凡數
閱矣緬惟尚書史記所載古帝王治化之隆各極

其至而孔子於堯曰惟天為大惟堯則之蕩蕩乎
民無能名焉於舜曰無為而治孟子則曰王者之
民皞皞如也予嘗推繹其旨想見唐虞中天之盛
乃今思

皇祖之世之民有以知孔孟之言信乎其能知聖人也
皇祖自親政之始即手鉏三葉蕩定南疆滇黔閩粵之
輿揭日月而掃氛霧海內赤子喁喁向風由是亭
之毒之煦以淳風沃以甘澍浸以醲化甄以大鈞

數十年之間南莫臺澎北犁沙漠命將肆征而間
左無徵發之警

親臨淮河指授方畧歷吳會涉會稽登岱宗謁闕里西
巡關隴抵雲中三覲

祖陵觀於東海歲出塞外獮狩上都

天行之健古無以加而庠序詠仁氓庶樂業市廛殷阜
卒伍服習熙熙然相忘於無所事事於焉正晷緯
考律度定元聲煥為

宸章灑為

奎翰集古帝王文治之大成而

穆清宥密凝然不見經營之迹簡任公卿百執事器使

而責其成俊壽魁碩布列有位外自節鉞連帥以

至守令賢否清濁立判剔侵蠹勵廉平吏治蒸蒸

無綜核之煩而德意宣究蠲逋賑恤肆赦緩刑指

揮

深宮之中風馳萬里匹夫匹婦無不浸濡涵育鼓舞德

化而不能自己當其時誠所謂不識不知順帝之
則者耶歷今廿餘年遺澤餘烈深入人心固結而
不可解迴溯

鼎成之初謳思如一日夫乃恍然曰是所謂至仁如天
民無能名者也無為而治恭己南面者也孟子所
謂王民皞皞者也於戲四海九州之民無得而名
予小子又烏能名之憶自幼冲蒙

皇祖撫愛日侍

左右用人行政皆覩記所及簡冊紀載政如杓衡規天
躔次測日可見者迹象而已於穆之運重離之明
終無能言其所以然者盟誦之次稽首敬為之序
以志紹庭繼序之忱於罔斁云

世宗憲皇帝實錄一部

雍正十三年十月

皇上命儒臣恭纂次第進呈

親加恭定書成凡一百五十九卷

皇上御製序 國家受

天眷命集慶垂光承承繼繼肆我

皇考世宗憲皇帝荷

三聖之洪庥祇紹

聖祖仁皇帝丕緒宵衣旰食底區宇於和恒以茂衍億
萬年無疆之社厚德隆功溢於簡牒巍乎煥乎治
平之盛軌未有逾茲者也

皇考徇齊敦敏仁孝性成蚤歲承歡

聖祖友愛同氣迨膺大統一切禮儀隆備

廟號尊崇莫不定自

宸衷符乎典則仰惟

聖祖仁皇帝臨御六十餘年歲澤洽人心醇化流方外

豐亨豫大之福極盛無加

皇考承邳治之餘因時制宜以善繼而善述惟是本之以誠持之以敬行之以中正要之以寬仁用能杜玩愒於熙時縣昇平之泰運大經大法粲然為後

嗣子孫法焉薦馨

郊

廟必躬必親旁秩祀典懷柔百神間遇水旱微愆祈禱
深宮罔弗潛孚立應

聖學高深探性命之精操治平之要天德王道一以貫
之隆禮

先師孔子增祀先儒右文重道之典超越常制猶復
表章經術廣勵士風籲俊興賢蔚昌德造辟雖鐘

鼓後先疏附之風殆無以過念用人為愛民之本
自公孤卿尹下至庶司百職事登明選公咸稱任
使而守令之親民暨封疆大吏之司董率者尤屢
聖心重撫字之方嚴貪墨之罰明四目達四聰賜復蠲
租農桑被野遂躋斯民於衽席之安刑罰者所以
佐政教之不逮也

皇考如天好生既已刊布律令俾愚氓重於犯法復詳
定貴賤服色兵民婚喪禮制更闡明

聖祖諭旨十六條細加訓註家喻戶曉翕然從風河防
之關於運道民生也萬里黃流滙以百川之水究
徐而下歲苦沮洳

皇考默運神謀指示經畫加長滙之石堰闢三省之引
河渙發帑金厥有成績又吳越海塘南北水利凡
可以惠此蒸黎者悉因時而修舉之先是

聖祖親統六師平定沙漠威靈所加青海扎什巴圖兒
等震警承令因沛殊恩畀以爵秩垂三十年而羅

卜藏丹津與吹拉克諾木齊等誕敢首造逆謀擾犯邊域

皇考聲罪致討密授方畧於間帥戈鋌所指電掃風驅振旅獻俘勒成功於太學準噶爾蠢動西陲數肆患於喀爾喀部落南方苗蠻蔓延行旅居民苦其侵掠

皇考為藩服計久遠為遐陬圖寧謐或命將興師或諭文武諸臣隨宜搜勦至逆夷悔禍輸誠傾心納土

則皆宥其前愆而曲賜包容焉德威並耀無遠弗
屆賜安南之地減朝鮮之貢俄羅斯南掌等國阻
昧幽深胥漸被於聲教他若警怠荒矯浮薄求言
納諫教孝褒忠宗室天潢之胄多方造就八旗根
本之地備予綢繆頒訓諭於臣工飭官常也錫侯
封於明裔示殊典也豐盈徧萬國而服御有經見
聖躬之儉焉嘉應在庶徵而憂勤益懋昭

聖德之謙焉蓋我

皇考試敬之心中正之道寬仁之恩悉同符乎

聖祖以綏猷而立極十三年中有如一日宜其治功之
盛網舉目張蕩蕩平平樂樂利利傳之愈遠而可
法可守也歟予小子繼序之初即命監修總裁大
學士等董率儒臣稽歷年之紀載敬謹纂修次第
進呈齋肅披閱迄今五載恭成

世宗憲皇帝實錄一百五十九卷在昔唐虞三代制治
保邦之道備載於書惟我

皇考際重熙累洽之盛勵精圖治良法美意歷久彌新
玉簡琅函實與典謨訓誥相輝映用是裝繕尊藏
朝夕循誦以志繹思衣德之義垂裕後昆永永無
極焉謹序

謹按纂修

實錄告成敬繕裝潢尊藏

皇史宬

大內

盛京各一部又繕一部尊藏內閣

皇上特諭閣臣以次呈

覽每日夙興恭閱

列祖實錄一卷

聖祖仁皇帝實錄一卷始出

蒞政周而復始按日罔間仰見我

皇上

紹庭繼序

聖治同揆

孝思維則云

國朝宮史卷二十二

欽定四庫全書

國朝宮史卷二十三

書籍二

聖訓

太祖高皇帝聖訓一部

康熙十年四月

聖祖仁皇帝命儒臣恭輯二十一年十月

命重修分類二十有六曰敬天曰聖孝曰神武曰智畧

曰寬仁曰論治道曰訓諸王曰訓羣臣曰經國
曰任大臣曰用人曰求直言曰興文治曰崇教
化曰勤修省曰節儉曰慎刑曰恤下曰輯人心
曰通下情曰明法令曰鑒古曰賞功曰昭信曰
誠逸樂曰謹嗜好書成凡四卷乾隆四年奉

旨校刊

聖祖仁皇帝御製序 朕惟帝王創業垂統傳之無窮
非獨世德茂也蓋亦有典則之貽焉其運之一心播

為成憲恒足以示道揆於子孫昭法守於臣庶盱衡
千古載籍是存矧其為大聖受命而興者乎皇哉何
規模之弘遠也我

太祖承天廣運聖德神功肇紀立極仁孝睿武端毅欽
安弘文定業高皇帝靈承休命誕受多方經綸於天造
草昧之年締構於王業艱難之日除殘伐暴度越漢
唐順天應人絜隆湯武所以茂弘風教宣暢聲靈振
舉綱維恢張疆宇者勒諸蘭臺之上布在方策之中

駿烈鴻猷燦然明備矣若其摭詞為典播告成經建邦立國之模戰勝攻取之畧化民成俗之務用人行政之方靡不道合樞機理歸體要有非臣鄙所能悉覩黎獻所能盡傳者不有成書何以彰

聖謨而答光訓乎朕紹庭繼緒志切覲揚因命儒臣分類編輯為目二十六為條九十有二總為

寶訓四卷浩浩乎乾包坤負之大皇之墳也秩秩乎民彝物則之常帝之典也以紹心法至中也以握化原

至正也以迓

天眷至順也以垂後昆至裕也率而循之欽承而無斁
之所以卜有道之靈長繇無疆之歷服胥於是焉在
奕世子孫尚其克念

祖武永永勿替也哉

皇上御製序 朕惟神聖首出濟世覺民立德立功
立言三者統而有之蓋仁義中正之極定於厥躬
布諸紀綱為巍巍之帝業頒諸誥令成洋洋之聖

謨文教彰明覃被海宇炳乎如日月之照臨窮天
地亘古今而莫不仰焉於戲盛哉洪惟

太祖承天廣運聖德神功肇紀立極仁孝睿武端毅欽
安弘文定業高皇帝體肖二儀量包六合應期受命肇
建丕基叶雲雷以展經綸法四時而宣教化六師
順動九有輸誠拯生民於塗炭之中轉宇宙為平
成之運當是時締造維新規模盡善武緯文經萬
物咸覩亦既布在方策傳信億年矣乃若心通造

化道綜百王吐辭成經發聲為律闡貞一之旨明
至善之宗論正學則以正心修身為先辨君道則
以求賢聽言為要昭晰乎

上天降監之原無念不將之以敬畏申儆乎君臣契合
之誼每事必體之以公誠以至班朝治軍明刑制
用靡不敷陳至理約而該複而不厭信乎有德者
必有言也我

聖祖嘗命儒臣編輯

聖訓四卷類聚條分燦然明備朕紹膺統緒追契徽猷
口誦心維匪伊朝夕仰見義蘊之淵閎典章之畫
一庶政之周詳直與帝典周官同其廣大顧金匱
石室之藏廷臣無由得見是用敬加剞劂宣示萬
方俾我子孫臣庶率而循之世世罔斁奉之涖政
可以致治保邦準以淑躬可以做心寡過益一時
之制作而萬古之世道人心胥賴焉非甚盛德其
孰能及此乎謹序

太宗文皇帝聖訓一部

世祖章皇帝命儒臣恭輯未及成書康熙十年四月

聖祖仁皇帝命續輯二十一年十月

命重修分類二十有三曰論治道曰訓諸王曰訓羣臣

曰謙德曰寬仁曰智畧曰求賢曰求言曰輯人

心曰恤民曰勸農曰興文教曰訓將曰勵將士

曰懷遠人曰訓諸藩曰恤降曰招降曰恤舊勞

曰敦睦曰節儉曰謹嗜好曰禁異端書成凡六

卷乾隆四年奉

旨校刊

聖祖仁皇帝御製序 朕惟帝王誕膺天眷肇造丕基
功德懋隆疆宇日闡有紀綱以昭大法即有謨訓以
啓後昆方策具存燦然可考也若夫道兼作述業裕
創垂以聖繼聖而鉅烈鴻猷煥乎宇宙間者尤足冠
百王而立極焉欽惟

太宗應天興國弘德彰武寬溫仁聖睿孝隆道顯功文

皇帝躬上聖之資承開天之運神武不殺寬和有制萬國向化而賓從庶績撫辰而就理峻德宏勲巍巍蕩蕩稱極盛矣至於命令誥誡播弘詞皆義切訓行理歸體要洪纖畢舉本末咸周而其大指之所存則首在於重養生民旁求俊乂勅幾凝命惇典明倫大哉王言誠治平之極則也我

皇考世祖章皇帝嘗命纂修未竟厥緒朕嗣膺歷服念切繼承爰命儒臣詳加編輯計一百一十一條分二

十三類定為

聖訓六卷既成因披陳莊誦朝夕繹思見夫旨原於精
一義著於典謨上之可以正道揆焉下之可以昭法
守焉書曰監于先王成憲其永無愆詩曰不愆不忘
率由舊章自昔詩書所載莫不以紹衣為兢兢矧夫
義蘊精深規模宏遠嘉言彞訓超踔古今朕用是覲
揚光烈昭示來許後之子孫以此蘊之於心則為天
德敷之於政則為王道範圍臣庶則為會歸之極垂

裕後昆則為詒燕之謀尚其夙夜祇承以為致治保邦之本而迓祈天永命之休也是為序

皇上御製序 聖人之情因辭以見易曰修辭立其

誠所以居業也蓋以通天下之志以成天下之務

本乎至誠施諸命令無意於辭而理臻其極歷觀

堯舜禹湯文武之世典謨訓誥蘆然具存後人奉

之為經列在學宮為載籍首矧夫運際開天功存

繼志制作倖造化教澤被生民天下之文章孰有

大於此者乎欽惟

太宗應天興國弘德彰武寬溫仁聖睿孝敬敏昭定隆
道顯功文皇帝英姿挺出聖武布昭大智如神淵衷若
谷及登寶位疆宇日增厚祿以養賢勤身而率下
恩威所及大畏小懷政教所孚遠來近悅皇哉何
化理之神也至若敷陳治道誨諭臣民不尚虛文
惟崇大體謂行善所以事天而遠利始能服衆闡
伊尹一德之訓稱曾參三省之言以勸農講武為

立國之大經以考古讀書為服官之要務自立綱
陳紀以逮服飾器物之間或即事以宣猷或因時
而定制洪纖咸備張弛攸宜蓋察理精故見之也
遠更事久故慮之也詳用能承藉丕基佑啓

聖哲是誠億萬年繼往開來之極軌也順治中嘗因記
注舊文纂修

聖訓一書未竟厥緒

聖祖仁皇帝特命儒臣詳加編輯事以類分凡二十有

三言以條舉凡一百一十有一彙為六卷體要著
明朕在宮中蒙

皇考思勤教育定省之時備聞

聖訓嗣膺大統志切繼承晨夕披陳尋繹仰見心符道
要語中機宜旨蘊宏深函蓋天地文辭昭晰彪炳
日星垂裕後昆永昭法守用是勒有成書敬授剞
劂頒示中外書曰聖謨洋洋嘉言孔彰又曰聖有
謨訓明徵定保我子孫臣庶其誦習遵循永敬承

於世世哉謹序

世祖章皇帝聖訓一部

康熙二十一年十月

聖祖仁皇帝命儒臣恭輯分類三十有二曰論治道曰
敬天曰聖孝曰聖學曰謙德曰節儉曰儆戒曰
敦睦曰諭羣臣曰求言曰納諫曰任官曰考績
曰選舉曰戒飭臣下曰理財曰恤民曰賑濟曰
重祀典曰禮前代曰褒忠節曰興文教曰諭將

帥曰招降曰諭外藩曰仁政曰體羣情曰安民
曰慎刑曰懲貪佞曰除弊曰宥過書成凡六卷
乾隆四年奉

旨校刊

聖祖仁皇帝御製序 朕惟自古膺圖御歷之后躬集
大統手致太平懋烈豐功光前翼後行之為政斯發
之為言義蘊固卓越乎百王訓行尤昭示乎奕禩惟
聖有作後人述焉千載同揆也我

皇考世祖體天隆運英睿欽文大德弘功至仁純孝章
皇帝神靈首出智勇天授秉英斷之姿而持以恭儉擴
寬仁之量而濟以憂勤爰是冲齡定鼎薄海歸心救
生民於水火之中而庶政咸熙萬邦作乂德盛勲崇
曼哉莫尚矣若夫宵旰圖維宮庭訓勅煌煌綸綍嘉
言孔彰究聖學之高深著王道之正直凡所以凝

天命揚

祖德顧民若持國體者叮嚀反覆深切著明而意旨所

注尤殷殷乎省躬克已納誨親賢綱紀畢張淵衷若
歎及乎訓誡臣下守正奉公鼓勵激揚至誠感發靡
不輸服而効忠黽勉而奮績也盖自我

太祖高皇帝肇造鴻基

太宗文皇帝式廓駿業而我

皇考心傳合一丕顯丕承弘闡經猷布為政教所以即
事成謨遇物為誥包羅典冊釐剔章程美善畢臻巨
細咸備堯咨舜傲何以加茲朕祗承遺緒惕厲靡寧

瞻方策之常新
儻羹牆之如覩
因命儒臣分類
編纂
朕復詳加披繹
計一百一十三
條統為

聖訓六卷實諸金匱拱若球圖俾後世子孫知我

皇考之詒謀燕翼百世無疆開國經綸萬年時叙所以
杜愆忘而遵典則者心法於是乎在書曰紹聞衣德
詩曰紹庭上下陟降厥家嗚呼可不敬哉

皇上御製序 古昔帝王應運而興開物成務有君

天下之規模凝命勅幾有師天下之典則故言出

而成經教思所被率土歸仁歷觀往代紀載肇乎
二典彞倫叙於九疇罔不播為成憲炳若日星簡
籍具存可考而知也欽惟我

世祖體天隆運定統建極英睿欽文顯武大德弘功至
仁純孝章皇帝秉岐嶷首出之資建永清大定之業冲
齡踐阼統一車書義問達乎梯航仁聲徧於塗巷
盛德大業富有日新自唐虞三代以來史冊所傳
罕有及者至若洋洋聖謨包涵萬有大之關倫教

綱常之重而閭閻之日用飲食所弗遺精之在身
心性命之微而官府之制度典章所必飭巨細畢
該網維盡善要惟本精一執中之奧蘊以成經世
服物之鴻謨誕告多方嚴明愷摯訓勅有位深切
周詳意皆出乎至誠理尤協於克一用以光大前
徽開萬年有道之長曼乎與天地為昭矣我

聖祖仁皇帝躬承

先訓命儒臣分類編輯計一百一十有三條彙成

聖訓六卷以傳久遠我

皇考念切紹衣宮庭宵旰追述

先猷朕從溫清之時聞知維謹嗣膺大統志在覲揚朝

夕披陳具見開國經綸超越前古詒謀燕翼垂裕

無窮是用敬為剏刻昭示臣民俾海隅出日之遠

咸覩光華寶之如圖球信之如著蔡是訓是行欽

承勿替庶幾道德一而風俗同唐之政要宋之寶

訓夫豈可同年而語者哉謹序

聖祖仁皇帝聖訓一部

雍正九年

世宗憲皇帝命恭纂

實錄諸臣并輯分類三十有二曰聖孝曰聖德曰聖學

曰聖治曰敬天曰法祖曰文教曰武功曰恤民

曰任官曰廣言路曰嚴法紀曰理財曰慎刑曰

重農桑曰興禮樂曰省方曰治河曰澄叙曰賞

賚曰蠲賑曰積貯曰飭臣工曰訓將士曰褒忠

節曰卹舊勞曰廣幅員曰宏制度曰弭盜曰牧
政曰禮前代曰柔遠人書成凡六十卷乾隆六
年奉

旨校刊

世宗憲皇帝御製序 朕荷

皇考聖祖仁皇帝付託至重兢兢業業早作夜思以期
無負繼述仰惟

皇考留貽矩矱朕得監於成憲是則是倣實天下萬世

所當欽承觀法爰命大學士等纂修

聖祖仁皇帝實錄閱時九載書成千卷自古帝王功德之隆盛紀載之繁富未有加於此者顧

實錄乃編年之書我

皇考順時布化若

天道之流行春秋冬夏各協其時而其中條分縷析飭綱振紀精微所寓隨舉一端皆為法式於是復令纂修諸臣分類恭輯聖訓六十卷洋洋乎

盛德

大孝敬

天勤民文教之誕敷武功之赫濯禮樂之明備政刑之

修舉一經

睿謨千古莫易夫六經諸史之傳皆有經有緯朕於

皇考神功聖德精心體察以

實錄為經以

聖訓為緯於編年見因時之宜於分類見隨事之要一

敷施而有所循也一話言而有所守也一寤寐飲食而有所遵也於戲如天之仁如日之照如神之哲萬類雖曠莫不含弘并包於

聖人之度內而儆惕訓諭之辭尤必凜凜於時幾孜孜於熙績勤勤於小民之恬養疊疊於嘉師之祥刑蓋聖心愈切而

聖德愈崇是以統乾坤之範圍而不過發聖賢之閭奧而靡遺以六十餘載之鴻規為千萬世後昆之垂裕

其所裨益曷有涯量哉此朕命官敬纂

皇考實錄而又恭繕

聖訓之深意子子孫孫其永寶諸

皇上御製序 自古聖人誕受天命為下民君師必

亶聰明睿知之資首出乘乾以綏猷而立極凡其

經緯萬端敷之彛訓者罔不深切著明炳日星而

章雲漢典謨所載雅頌所陳唐虞三代之隆有如

一轍欽惟

皇祖聖祖合天弘運文武睿哲恭儉寬裕孝敬誠信中和功德大成仁皇帝聖德廣運久道化成文治光昭武功赫濯薄海內外深山窮谷之衆總淪浹於仁心仁政之中教思無窮訓詞深厚厯考熙朝之運未有際此崇隆者也肆我

皇考世宗憲皇帝以

聖繼

聖用人行政一一仰法

前徽既纂修

實錄成書復分類恭輯

聖訓六十卷俾

皇祖六十餘年敬

天尊

祖經國保民農田學校禮樂兵刑之盛蹟見之都俞吁

咈間者燦然常新蘆然備具永貽我後嗣子孫億

萬年昇平桀範蓋

皇祖性本生安道兼創守實集千古聖帝明王之大成
是以

聖謨洋洋明徵定保宏綱鉅目有要有倫精一之心傳
蕩平之王路胥不外乎此也予小子昔在齠齡早
荷

聖慈賜育宮庭祇聆

訓迪茲膺基緒紹聞衣德之志兢兢業業不懈益虔昕
夕尋繹惟期懋遵

祖訓以無負

皇考善繼善述之詒謀顧金匱石室之藏中外無得見者爰命儒臣敬謹繕寫授之剞劂庶我

皇祖聖祖仁皇帝建中表正牖民覺世之言昭垂寰宇羣工士庶咸得漸摩於

聖訓之崇閣而率由無斁也不亦庶與謹序

世宗憲皇帝聖訓一部

乾隆五年二月

皇上命恭纂

實錄諸臣并輯分類三十曰聖德曰聖孝曰聖學曰聖
治曰敬天曰法祖曰文教曰武功曰敦睦曰用
人曰恤臣下曰愛民曰恤兵曰察吏曰訓臣工
曰勵將士曰廣言路曰理財曰慎刑曰重農桑
曰厚風俗曰治河曰蠲賑曰積貯曰謹制度曰
崇祀典曰篤勲舊曰褒忠節曰綏藩服曰弭盜
書成凡三十六卷乾隆六年奉

旨校刊

皇上御製序 自古人君有盛德大業者其規畫周
詳而詒謀悠遠則必敷之彛訓以明定保之徵紀
之簡編以著經綸之跡非徒為一時事功計也亦
將以示後嗣昭法守焉我

皇考世宗憲皇帝亶聰明睿智之資建中立極茂登上
理

御極十有三年體

聖祖之心以為心法

聖祖之政以為政祇承

郊

廟惇睦宗親整飭官方修明法度正人心厚風俗文經
武緯禮序樂和凡宏綱鉅目罔不默運於

深宮乾健之精神以圖其久安而計其久遠聖謨洋洋
有典有則或因人以立教或隨事以敷言存之淵
然而有條理發之渙然而無凝滯其與二帝三王

都俞吁咈咨警誥誠之旨曷以異焉允矣彪炳之
綸音治平之模範也可不謂至盛者與既命大學士等
詳慎纂輯恭成

世宗憲皇帝實錄一百五十九卷復於編年繫日之中
分類備錄恭成

聖訓三十六卷仰惟

皇考德合天地明並日月序參四時躬荷

聖祖仁皇帝積厚之貽善繼善述故乃保泰持盈誠民

阜物寓惇大於明作劑整肅以寬仁致治規條炳
如星日豈第予小子朝乾夕惕之衷期於謹凜率

由嗣守

丕緒繼自今億萬斯年子孫臣庶沾被熙洽之澤者庶

咸有以遵

聖訓之光昭而頌

鴻猷之允塞也謹序

庭訓格言一部

世宗憲皇帝侍奉

聖祖仁皇帝時敬承

庭訓念篤不忘

御極之初紀錄薈編以昭

家法展

孝思書成凡二百四十二則雍正八年奉

旨校刊

世宗憲皇帝御製序 欽惟

皇考聖祖仁皇帝性秉生安道參化育臨御悠久宇宙
清寧六十載

聖德神功超越萬古凡為史臣所記注黎獻所覩聞者
固已備編於

實錄

寶訓珍藏於金匱琅函喬喬皇皇盛矣大矣朕曩者偕
諸昆弟侍奉

宮庭親承

色笑每當視膳問安之暇

天顏怡悅倍切

恩勤提命諄詳鉅細悉舉其大者如對越

天

祖之精誠侍養

兩宮之純孝主敬存誠之奧義任人數政之宏猷慎刑
重穀之深仁行師治河之上畧圖書經史禮樂文章
之淵博天象地輿歷律步算之精深以及治內治外

養性養身射御方藥諸家百氏之論說莫不隨時示
訓遇事立言字字切於身心語語垂為模範蓋由我
皇考質本生知而加以好學聖由天縱而益以多能舉
天地間萬事萬物之理融會貫通以其得之於心者
宣為至教視聽言動悉合經常飲食起居咸成矩度
而

聖慈篤摯啟迪周詳涵育薰陶循循善誘朕四十年來
祇聆默識夙夜凜遵仰荷纘承益圖繼述追思疇昔

天倫之樂緬懷丁寧告戒之言既歷歷以在心尚洋
洋其盈耳謹與誠親王允祉等記錄各條萃薈成編
恭名為

庭訓格言於戲

聖謨弘遠包涵無際以今所紀揆昔所聞僅存什一於
千百闕畧甚多實深愧悚然是編也文辭精要意
旨深長苟能引伸而擴充之則片語能涵衆義隻字
可括千言雖卷帙簡約而格致誠正修齊治平之道

罔弗兼該堯舜禹湯文武周孔之傳一以貫之矣爰
奉秘集壽之琬琰以昭垂於億萬世書曰監于先王
成憲其永無愆詩曰詒厥孫謀以燕翼子勗哉後嗣
恪循

祖訓念茲罔斁受益靡窮世世子孫尚其永久敬承哉
謹序

聖諭廣訓一部

康熙九年十月

聖祖仁皇帝頒發

聖諭十六條曰敦孝弟以重人倫曰篤宗族以昭雍睦
曰和鄉黨以息爭訟曰重農桑以足衣食曰尚
節儉以足財用曰隆學校以端士習曰黜異端
以崇正學曰讀法令以儆愚頑曰明禮讓以厚
風俗曰務本業以定民志曰訓子弟以禁非為
曰息誣告以全善良曰戒窩匪以免株連曰寬
錢糧以省催科曰聯保甲以弭盜賊曰解讎忿

以重身命

世宗憲皇帝復引伸推行各成一篇為廣訓萬言雍正

二年奉

旨刊行直省州縣朔望宣講俾臣庶敬聽之下共知勸

儆率循以臻一道同風之治

世宗憲皇帝御製序 書曰每歲孟春道人以木鐸徇

于路記曰司徒修六禮以節民性明七教以興民德
此皆以敦本崇實之道為牖民覺世之模法莫良焉

意莫厚焉我

聖祖仁皇帝久道化成德洋恩普仁育萬物義正萬民
六十年來宵衣旰食祇期薄海內外興仁講讓革薄
從忠共成親遜之風永享昇平之治故

特頒上諭十六條曉諭八旗及直省兵民人等自綱常
名教之際以至於耕桑作息之間本末精粗公私鉅
細凡民情之所習皆

睿慮之所周視爾編氓誠如赤子

聖有謨訓明徵定保萬世守之莫能易也朕纘承大統
臨御兆人以

聖祖之心為心以

聖祖之政為政夙夜黽勉率由舊章惟恐小民遵信奉
行久而或怠用申誥誠以示提撕謹將

上諭十六條尋繹其義推行其文共得萬言名曰

聖諭廣訓旁徵遠引往復周詳意取顯明語多直樸無
非奉

先志以啓後人使羣黎百姓家喻而戶曉也願爾兵民等仰體

聖祖正德厚生之至意勿視為條教號令之虛文共勉為謹身節用之庶人盡除夫浮薄囂凌之陋習則風俗醇厚家室和平在朝廷德化樂觀其成爾後嗣子孫並受其福積善之家必有餘慶其理豈或爽哉

世宗憲皇帝上諭一部

雍正七年王大臣等議准侍讀學士康五瑞奏

請刊布

上諭以裨人心政治首列議覆

諭旨書用編年體自康熙六十一年八月至雍正七年
凡二十四冊九年刊成

皇上御極後續編自雍正八年至十三年八月凡八
冊乾隆六年刊成

頒布中外前載

世宗憲皇帝諭旨 年來內外大小臣工奏請刊布上

諭者甚多朕皆未允今侍讀學士康五瑞又復陳請
怡親王大學士九卿翰詹科道等衆議僉同言詞懇
切朕自御極以來時時以牖民覺世為懷是以告誡
臣工訓誨士庶化導兵弁者周詳往復不憚煩勞無
非欲其慕義向風遷善改過共由於正直蕩平之途
也凡此詔諭所頒皆以

皇考之心為心以

皇考之政為政繼志述事率由舊章當時

聖諭之所啟迪包涵者朕則闡揚而詳發之其中間有
因革損益先後不同者則因時制宜化裁變通之道
也惟是歷年諭旨或因一省而發或因一事而發有
司等照例宣示於該管之處其別省遠地豈能一一
周知且傳寫悉經書吏之手字句之間往往錯訛遺
漏夫欲使薄海之廣臣民之衆遵道遵路易俗移風
必使天下之人備聞朕訓深知朕心庶幾感發奮興
以為進德修業之助今王大臣等既稱上諭刊布有

裨益於人心政治著照所請行朕亦不敢謂朕之諭
旨可以有勞來匡直之功惟冀億萬臣民共知朕提
撕警戒之苦心耳

世宗憲皇帝硃批諭旨一部

雍正十年三月

世宗憲皇帝檢發硃批臣工章奏

諭旨分人編次刊布中外乾隆三年奉

旨續刊共百有十二冊凡二百二十三人

世宗憲皇帝御製序 朕向在藩邸未諳政事不識一人毫無閱歷聞見及受

皇考聖祖仁皇帝付託之重臨御寰區惟日孜孜勤求治理以為敷政寧人之本然耳目不廣見聞未周何以宣達下情洞悉庶務而訓導未切誥誡未詳又何以使臣工共知朕心相率而遵道遵路以繼治平之政績是以內外臣工皆令其具摺奏事以廣諮諏其中確有可採者即見諸施行而介在兩可者則或勅

交部議或密諭督撫酌奪奏聞其有應行指示開導
及戒勉懲儆者則因彼之數陳發朕之訓諭每摺或
手批數十言或數百言且有多至千言者皆出一已
之見未敢言其必當然而教人為善戒人為非示以
安民察吏之方訓以正德厚生之要曉以福善禍淫
之理勉以存誠去偽之功往復周詳連篇累牘其大
指不過如是亦既殫竭苦心矣至其中有兩人奏事
而朕之批示迥乎不同者此則因人而施量材而教

嚴急者導之以寬和優柔者濟之以剛毅過者裁之
不及者引之並非逞一時之胸臆信筆直書前後矛
盾讀者當體朕之苦心也此等奏摺皆本人封達朕
前朕親自閱覽親筆批發一字一句皆出朕之心思
無一件假手於人亦無一人贊襄於側非如外廷宣
布之諭旨尚有閣臣等之撰擬也雍正六年以前晝
則延接廷臣引見官弁傍晚觀覽本章燈下批閱奏
摺每至二鼓三鼓不覺稍倦實六載如一日此左右

近侍及內直大臣所備知者近年以來天下庶政漸次就理下情稍覺洞達臣工之奏摺較前減少而朕躬精力亦不如前批答之事始從簡便此實情實事可舉以告天下者今檢內外諸臣繳回硃批之摺不下萬餘件因思自古帝王治天下之道以勵精為先以怠荒為戒朕非敢以功德企及古先哲王而惟此勤勉之心自信可無忝於古訓實未負我

皇考付託之深恩也又念此等批示之語實出於朕之

苦心或可為人心風俗之一助但本人承旨之時不敢宣露於外他人無由知之今將外任之大臣官員奏摺經朕手批酌量可以頒發者檢出付之剞劂計算實不過十分之二三俾天下臣民展讀咸知朕圖治之念誨人之誠庶幾將此不敢暇逸之心仰報我皇考於萬一耳或人人觀此而感動奮發各自砥礪共為忠良上下蒙福朕心愉快更當何如

皇上御製後序

皇考世宗憲皇帝天縱聖神精勤庶政四方文武臣僚
具摺言事者日或數人人或數事緘封直達

御前手自批發或立見施行或咨詢廷議善者溫綸褒
予過者訓戒諄諄隨宜指示悉出

睿裁一字不假手於人御極十有三年常如一日粵雍
正十年

特檢歷年批發奏摺命內廷詞臣繕錄校理付諸剞劂
彙成數帙輒以

頒賜在廷羣臣工未告竣奄遘

上賓予小子纘紹丕基敬展遺篋見所貯

手批奏摺不下數萬

奎畫爛然充溢巨麓然以未經

皇考檢定不敢意為增益謹就檢錄已定者彙著為目

前後凡二百二十三人分一百一十二帙統為十

八函當時隨檢隨發無先後倫次茲亦不復排類

蓋摺奏浩繁不勝編錄所刻僅十百中之一二畧

見大凡本非全覽故也既告歲事謹綴序言於後
洪惟我

皇考至仁如天至明如日至誠如神簡拔賢才任之以
心膂股肱之寄開誠布公藹然家人父子無不可
盡之言諸臣之才具大小短長與性質之剛柔強
弱克知灼見如權衡繩尺之不爽片長足錄亟登
而進之有不及則激厲而開導之稍肆焉則裁抑
之其陷於過始則訓飭之能改則已不悛則戒儆

之使知悔艾終於怙惡則亦未嘗姑容然哀矜惻
怛之意尚流溢於毫楮間也同一事而此或俞之
彼或拂之非有所好惡於其間也蓋俞之者必有
可俞之道而拂之者亦必有可拂之端同一人而
始或予之終或斥之非有所喜怒於其間也蓋始
有可予則予之終有可斥則斥之明燭幾先坐悉
情偽遠隔萬里遲閱數年

睿鑒所周範圍莫越正人心厚風俗兢兢業業儆戒無

虞雖屢豐見告瑞應頻仍而惟是憂勤惕厲之心
久而益篤記有之曰天道至教聖人至德春秋冬
夏風雨霜露無非教也我

皇考之為治一天道之運行教澤所被百志惟熙即萬
世而下尚如日月之照臨光景常新春風之煦然
被物不自知其感動奮發而興起也予小子寅承
鴻業自惟寡昧無能企逮萬一仰法

皇考明目達聰孜孜圖治之心祇紹

徽猷夙夜黽勉其服教畏神警省弗怠之志詎敢以歲

月易耶謹序

世宗憲皇帝上諭八旗一部

上諭旗務議覆一部

諭行旗務奏議一部

世宗憲皇帝命編次旗務

諭奏依編年體初編自康熙六十一年十一月至雍正

五年十二月各五卷續編自雍正六年正月至

十年十二月卷數如前統為三十卷

欽定訓飭州縣規條一部

世宗憲皇帝澄叙官常嘉惠牧令先後

命大學士朱軾總督田文鏡等各抒所見條列進

御

親加閱定分類二十日到任曰交盤曰關防曰宣講

聖諭律條曰放告曰催科曰借糶倉穀曰弭盜曰驗傷

曰聽斷曰堂事曰防胥吏曰慎延幕賓曰待紳

士曰免行戶曰謹差下鄉曰勸農桑曰嚴禁獄

曰講讀律令曰操守雍正八年書成校刊奉

旨頒賜直省知州知縣各一部

世宗憲皇帝御製序 牧令為親民之官一人之賢否

關係萬姓之休戚故自古以來慎重其選而朕之廣

攬旁求訓勉誥誡冀其奏循良之績以惠我烝黎者


亦備極苦心矣惟是地方事務皆發端於州縣頭緒

紛繁情偽百出而膺斯任者類皆初登仕籍之人未

練習於平時而欲措施於一旦無怪乎徬徨瞻顧心志茫然即採訪咨詢而告之者未必其盡言無隱此古人所以有學製美錦之歎也向以大學士朱軾左都御史沈近思外任多年周知地方利弊雍正二年曾令二臣商著規則以為州縣之南車乃書未就緒而沈近思物故邇年以來朱軾復時多病此事遂至遲延去年始降旨委諸總督田文鏡李衛令二臣各抒所見繕錄諸條以進朕親加披覽見其條理詳明

言辭愷切民情吏習罔不兼該大綱細目莫不備舉
誠新進之津梁庶官之模範也在二臣各就其所閱
歷者而言繁簡同異之間不必一致而慎守官方勤
恤民隱興利除害易俗移風其大指則一而已矣爰
就本文付之剞劂頒賜州縣官各一帙俾置之几案
間朝夕觀覽省察提撕治效未臻必思所以勉之弊
端未革必思所以去之本之以實心行之以實力毋
始勤而終怠毋靜言而庸違如此則不但國家得司

牧之賢草野有父母之頌而爾等身膺顯擢叨被榮
光福貽子孫名標史冊豈不美與



欽定四庫全書

史部

國朝宮史卷二十四至

詳校官編修臣溫汝适

編修臣程嘉謨覆勘

總校官進士臣朱鈴

校對官中書臣陸湘

謄錄監生臣施華

欽定四庫全書

國朝宮史卷二十四

書籍三

御製

御製人臣做心錄一部

世祖章皇帝御製論八篇曰植黨曰好名曰營私曰徇利曰驕志曰作偽曰附勢曰曠官引據漢以下

史事足為炯戒者各加註釋用垂儆戒

訓于有位

世祖章皇帝御製序 朕惟人臣立身制行本諸一心
心正則為忠為直衆美集焉不正則為奸為慝羣惡
歸焉是故心者萬事之本美惡之所由出也顧事有
殊塗心惟一致一於國則忘其家一於君則忘其身
如此者不特名顯身榮邦家亦允賴之矣若夫姦邪
之流樹黨營私怙權亂政卒至身名俱喪為國厲階
蓋緣居恒無正心之功一當勢利遂昏迷瞽亂狂肆

驕矜上昧王章下垂臣誼或作威而聯羽翼或比匪
而效奔趨如潭泰石漢以累世舊臣久叨恩遇不思
圖報逞臆橫行跋扈自恣目無綱紀陳名夏則一介
豎儒驟蒙顯拔倚任深重賜賚優隆而乃背德植交
蔑法罔上此皆自作罪孽以致隕厥身家朕歷稽往
古宵人誤國代代有之觀諸近事復烱鑑昭然足為
永戒恐後之為臣者或仍蹈覆轍負主恩而渝素志
至於身罹刑憲悔悼無由故推原情狀而論列之錄

成一編以為人臣儆心之訓云

聖祖仁皇帝御製文集一部

自康熙元年至二十二年十一月

御製文凡四十卷內

勅諭十四卷奏書二卷表論辨二卷序一卷記一卷說
解一卷碑二卷頌一卷贊箴銘一卷雜著祭文
四卷賦一卷詩十卷是為一集

聖祖仁皇帝御製文二集一部

自康熙二十二年十一月以後至三十九年

御製文凡五十卷內

勅諭二十八卷表奏書一卷論說解一卷序一卷記碑

各一卷頌贊箴銘一卷雜著五卷祭文一卷賦

一卷詩八卷是為二集

聖祖仁皇帝御製文三集一部

自康熙四十年至五十年

御製文凡五十卷內

勅諭十八卷論一卷序記三卷碑記碑文文頌贊三卷
雜著十九卷雜著跋祭文賦合一卷詩五卷是
為三集

聖祖仁皇帝御製文四集一部

聖祖仁皇帝御製文集二集三集俱於康熙五十年校
刊五十一年以後

御製未及輯錄雍正十年

世宗憲皇帝命編錄校刊凡三十六卷內

勅諭二十卷論序二卷記碑記碑文一卷銘題跋文頌
一卷襍著七卷詩五卷是為四集

御製避暑山莊三十六景詩並圖一部

聖祖仁皇帝歲舉秋獮以肄武習勞康熙四十五年始

建

避暑山莊於熱河以為先期

駐蹕之所

御製記一篇并標舉勝概為三十六景分繪成圖各系

以

御製詩詞掌院學士臣揆叙等恭注康熙五十一年校

刊乾隆六年秋

皇上式循

舊典初莅山莊恭和

元韻各一首大學士臣鄂爾泰等恭注奉

旨校刊

御製千叟宴詩一部

康熙六十一年三月十八日

聖祖仁皇帝七旬萬壽先期正月一日戊子至四日辛

卯

錫宴乾清宮自滿漢文武大臣官員及致仕退休老民

凡六十五歲以上者咸預

命諸王貝勒以下及宗室授爵勸飲

頒賜食品

御製千叟宴詩一首預宴者皆和卷首恭冠

御製詩次內廷諸臣恭和詩十三首卷一大學士馬齊
以下至御史張令璜詩凡七十首卷二至卷四
不列名每卷三百二十首

御製耕織圖詩一部

聖祖仁皇帝敦重農桑

命繪耕織圖以示勸相之意臚事系詩各為一冊凡耕
圖二十有三曰浸種曰耕曰耙耨曰耖曰碌碡
曰布秧曰初秧曰淤蔭曰拔秧曰插秧曰一耘

曰二耘曰三耘曰灌溉曰收刈曰登場曰持穗
曰舂碓曰麤曰簸揚曰礱曰入倉曰祭神凡織
圖二十有三曰浴蠶曰二眠曰三眠曰大起曰
捉織曰分箔曰抹桑曰上簇曰炙箔曰下簇曰
擇繭曰窖繭曰練絲曰蠶蛾曰祀謝曰緯曰織
曰絡絲曰經曰染色曰攀華曰剪帛曰成衣每
幅七言絕句一首

皇上依次和韻刊刻成書

聖祖仁皇帝御製序 朕早夜勤毖研求治理念生民之本以衣食為天嘗讀豳風無逸諸篇其言稼穡蠶桑織悉具備昔人以此被之管絃列於典誥有天下國家者洵不可不留連三復於其際也西漢詔令最為近古其言曰農事傷則饑之本也女紅害則寒之原也又曰老者以壽終幼孤得遂長欲臻斯理者舍本務其曷以哉朕每巡省風謠樂觀農事於南北土疆之性黍稷播種之宜節候早晚之殊蝗蝻捕治之

法素愛諮詢知此甚晰聽政時恒與諸臣工言之於
豐澤園之側治田數畦環以溪水阡陌井然在目桔
槔之聲盈耳歲收嘉禾數十種隴畔樹桑傍列蠶舍
浴繭繅絲恍然如茆簷蔀屋因構知稼軒秋雲亭以
臨觀之古人有言衣帛當思織女之寒食粟當念農
夫之苦朕惓惓於此至深且切也爰繪耕織圖各二
十三幅朕於每幅製詩一章以吟咏其勤苦而書之
於圖自始事迄終事農人胼手胝足之勞蠶女繭絲

機杼之瘁咸備極其情狀復命鏤版流傳用以示子
孫臣庶俾知粒食維艱授衣匪易書曰惟土物愛厥
心臧庶於斯圖有所感發焉且欲令寰宇之內皆敦
崇本業勤以謀之儉以積之衣食豐饒以共躋於安
和富壽之域斯則朕加惠元元之至意也夫

世宗憲皇帝御製文集一部

乾隆三年奉

旨恭刊

世宗憲皇帝御製文集凡三十卷內

勅諭三卷

詔冊一卷論記一卷序三卷雜著二卷題辭贊一卷碑

文五卷祭文誄三卷

潛邸所作詩曰

雍邸集七卷

御極後所作詩曰四宜堂集三卷後附和碩怡賢親王

交輝園遺稿一卷

世宗憲皇帝御製題辭冠其端

世宗憲皇帝御製序 朕昔在雍邸自幸為天下第一

閒人然所謂閒者非若箕顓遺世竹林肆志之類也

朕生當國家鼎盛之時三逆蕩平四方寧謐仰蒙

皇考鍾愛承歡膝下位列親藩寢門定省之餘無他事

事境之所處間矣兼之賦性不樂浮華既無庸皇皇

於富貴更不煩戚戚於貧賤祇期消融機巧遂覺隨

處樂天情之所寄又閒矣雖然究其所以優游恬適

得四十餘年為一閒人者莫非我

皇考教育深恩有以成就之也朕素不嫻聲律每於隨
從塞北扈蹕江南偶遇

皇考命題屬賦勉強應制一博

天顏歡笑初不計字句工拙至於讌賞登臨觸物寓感
有會而作因詩紀事借以陶寫性情而已豈曰與文
人墨客較論短長耶歲月積久哀焉成集迨壬寅冬
恭承

皇考付託之重臨御寰宇封章重疊機務殷繁旰食宵衣猶虞叢脞夙興夜寐莫敢求安向之優游恬適今則易而為惕厲憂勤花朝月夕之吟皆成祁寒暑雨之思矣檢閱舊作曷勝惘然緬想曩日之間境閒情奚啻邈若河漢也哉爰序於雍邸集首以示朕意云

御製朋黨論一部

世宗憲皇帝御製論一篇以大公至正為歸斥歐陽修之說而正之以周易論語之義

訓諭臣工消除朋黨錮習雍正三年刊成

頒示天下

樂善堂全集定本一部

皇上青宮典學時所著詩文彙為

樂善堂全集乾隆二年刊刻成書二十三年復

親加刪訂為定本三十卷內論說六卷序一卷記跋

一卷雜著一卷表頌贊箴銘一卷賦三卷古體

詩九卷今體詩八卷奉

旨校刊

頒賜中外

皇上御製序 朕少讀尚書見二帝三王以及繼世之哲后君臣咨儆惟是身心性命之本原其敷政命官亦惟根柢道德而不規規於事為之末及考詩易四子之言凡論政者皆與書所稱同其指歸互為表裏其後博涉諸史則雖明盛之世所殫心竭慮者大概詳於事功而略於本原教化之升降

治象之崇卑其分歧實判於此用是日有孜孜求所以取道入德之門蒙

皇考示以明理立誠之大訓而略得其統貫又念修辭必本乎誠故凡見於古文詩辭者咸以是為宗而不敢有貳焉往者歲庚戌曾錄數年中所作序論書記雜文詩賦次為十有四卷置諸几案時就所言以自檢其行嗣是所作蓋四倍前繼序以來躬理萬幾兢兢業業惟恐一事失宜負

皇考付屬之重思如曩時從容文墨之娛不可復得然
少有餘閒未嘗不考鏡經史以自觀省爰取庚戌
文鈔所載存十之三續作未訂入者存十之七總
為一篇共若干卷非欲以文辭自表著蓋是集乃
朕夙夜稽古典學所心得實不忍棄置自今以後
雖有所著作或出詞臣之手真贋各半且朕亦不
欲與文人學士爭巧以轉貽後世之譏則是集之
輯有不得已者記曰本諸身徵諸庶民曩予自檢

所行以勉副所言者乃日用酬酢之常今茲所行
事無大小莫非政教之平陂生民之苦樂相倚不
可以中立者也因此益自儆惕而克艱天位顧畏
民畧庶幾明理立誠之學參前倚衡永永勿替也
夫

皇上御製原序 予生九年始讀書十有四歲學屬
文今年二十矣其間朝夕從事者四書五經性理
綱目大學衍義古文淵鑑等書講論至再至三顧

質魯識昧日取先聖賢所言者以內治其身心又
以身心所得者措之於文均之未有逮也日課論
一篇間以詩歌雜文雖不敢為奇辭詭論以自外
於經傳儒先之要旨然古人所云文以載道者內
返竊深慙忽每自思念受

皇父深恩時聆訓誨至諄且詳又為之擇賢師傅以受
業解惑切磋琢磨從容於藏修息游之中得以厭
飫詩書之味而窮理之未至克己之未力性情涵

養之未醇中夜以思惕然而懼用是擇取庚戌秋
九月以前七年所作者十之三四略次其先後序
論書記雜文詩賦分為十有四卷置在案頭便於
改正且孔子不云乎言顧行行顧言書曰非知之
艱行之惟艱常取余所言者以自檢所行倘有不
能自省克以至於言行不相顧能知而不能行余
愧不滋甚乎哉

皇上諭旨 近日偶閱樂善堂集緣初刻所存卷帙

頗繁其中多有不甚愜心之句昔人云文章千古得失寸心朕非悔其少作博不恡情去留之名政以隨時刪訂則今昔詣力所到端可藉以自驗其令內廷諸臣悉心校閱分擬應存應刪簽貼進呈候朕裁酌重訂定本以付剞劂

御製詩初集一部

皇上萬幾餘暇寄情六義日以為程自乾隆元年丙辰迄十二年丁卯一紀中為古今體詩四十一百

五十首十三年尚書臣蔣溥恭請同內廷諸臣校錄刊刻凡四十四卷是為初集

皇上御製序 向序樂善堂集云夙昔典學所心得不忍棄置後雖有作或出詞臣之手真假各半且亦不欲與文人學士爭長故十數年來臣工以編次詩文集為請者概勿許然幾務之暇無他可娛往往作為詩古文賦文賦不數十篇詩則託興寄情朝吟夕諷其間天時農事之宜涖朝將祀之典

以及時巡所至山川名勝風土淳漓罔不形諸詠
歌紀其梗概積至今以數千百首計矣而較晴量
雨憫農疾苦之作為多觀其詩可以知憂勞而驗
今昔使閱歲逾時或致殘缺失次其不忍棄置較
先為甚因取丙辰以迄丁卯所作略加編定都為
四十四卷古今體計四千一百五十首有奇命翰
林中字畫端楷者分卷抄錄裝為一集不付剞劂
猶初志也

御製詩二集一部

皇上御製詩自乾隆十三年戊辰迄二十四年己卯

一紀中

天章美富卷帙較前倍增通計八千首有奇二十五年大學士臣蔣溥恭請同內廷諸臣校錄刊刻凡九十卷是為二集

御製文初集一部

皇上勅幾之暇作為古文諸體悉備自乾隆元年丙

辰迄二十八年癸未積至五百餘首侍郎臣于敏中恭請分類編次并繕錄刊刻凡三十卷內經筵御論二卷論說祝文一卷記四卷序五卷序跋書後一卷問辨一卷碑文七卷雜著一卷賦二卷連珠一卷頌箴一卷銘一卷贊三卷是為初集

皇上御製序 于敏中排次數年來所為御製文初集成而以序為請夫序者所以序陳經旨故孔子

作書序子夏作詩序未聞自序其文也自序其文
蓋漢唐以後之事乎為天子者所以修己治人必
當以三代以上自勗豈可以漢唐以下自畫此正
務也至於文乃其餘事耳亦豈可以漢唐以後為
法哉如是則敏中之請序可以不允既而思之向
之樂善堂全集及御製詩初集不既有序乎於凡
惕已敬

天本身徵民憫農桑驗今昔蓋已言之悉矣例以向不

可以不序而以向之言之悉則又可以不必序矣
雖然不欲與文人學士爭長亦向之本意也則今
之裒然成集者與向之言為合乎為否乎以之自
問又不能措一辭云

御製日知薈說一部

皇上青宮典學時筆記偶錄合二百六十則編為日
知薈說凡四卷乾隆元年校刊

皇上御製序 日知薈說者取予嚮日日課所為文

刪擇編次合而錄之爰定之以名也予稟承

庭訓懋學書齋留連往復於六經四子之書求其義蘊
精微旁搜諸史通鑑考定得失區明法戒以至儒
先緒論詞苑菁華莫不遍覽雖究心探索饜飫其
中然考之古聖賢躬行實踐之學蓋慙焉而未逮
自十有四歲學屬文至於今又一紀矣其間日課
詩論雜文未嘗少輟積成卷帙瑕瑜各半踐阼以
來萬幾待理豈復得如曩時專志篤學日與良師

友敬業樂羣於翰墨之場哉紬繹舊聞念茲弗釋
因取其精去其疵錄其正去其偏合二百六十則
釐為四卷而舉凡道德性命之旨學問政治之要
經傳之淵源古今之事迹莫不略見梗概夫日知
之說出自子夏繼以無忘所能必所知者日新不
失而賡續以極於高明乃為學問竊要若予嚮日
所得尚非空言而無濟實用則今班朝莅政之間
豈不足以考其知行合一與否以發抒聞見遜敏

敦修乎

御製圓明園四十景詩一部

圓明園為

世宗憲皇帝藩邸所居

賜園迨

續承大統命所司量加修葺式具朝署之規

御製記備述緣始

皇上御極之初所司以建園請弗許歲戊午即

圓明園之舊而居之既為後記復仿

避暑山莊詩例標舉勝景分題作繪序而詠之凡

四十篇大學士臣鄂爾泰等恭註乾隆十年奉

旨校刊

御製盛京賦一部

乾隆八年秋

皇上詣

盛京恭謁

祖陵

御製盛京賦一篇并序凡三千三百餘言大學士臣
鄂爾泰等恭註乾隆八年校刊

御製冰嬉賦一部

國俗舊有冰嬉以肄武事

皇上率循舊典爰於每歲冰堅之候於太液池聚八
旗武士陳之

御製冰嬉賦一篇以叙其事內廷諸臣恭註乾隆十

年校刊

國朝宮史卷二十四

欽定四庫全書

國朝宮史卷二十五

書籍四

方畧

親征平定朔漠方畧一部

聖祖仁皇帝三駕朔漠

親征準噶爾連破之噶爾丹窮蹙自伏其辜餘部悉定

振旅凱旋爰

允廷臣之請纂輯

方畧自康熙三十六年六月至三十七年十月系日記

事具載

神謨凡四十八卷四十七年奉

旨校刊

聖祖仁皇帝御製序 朕祇承

天眷懋紹

祖宗丕基為億兆生民主薄海內外皆吾赤子雖越在

邊徼荒服之地倘有一隅之未寧一夫之不獲不忍
忽然視也西北塞外喀爾喀七旗與厄魯特四部落
並號雄藩同奉職貢非一日矣不意有厄魯特噶爾
丹者賦性凶殘中懷狡詐戕害其兄弟兼并四部蠶
食鄰封其勢日張其志益侈朕初聞厄魯特與喀爾
喀交惡隨遣親近大臣頒恩賚以和解之迨其後興
兵構怨又命大臣曉譬利害諭令息爭乃噶爾丹抗
旨狂逞致喀爾喀為所潰敗叩關乞援朕收撫之置

諸邊內資給餼牽始皆得所而噶爾丹猶修郤如故
所在侵陵忽闌入我烏闌布通之地朕授鉞親王大
臣問罪聲討大師克捷未即殄除時賊倉皇宵遁深
懼我軍之窮追投牒指誓因而釋之假令噶爾丹能
自此悔過改圖則雖至今存可也夫何轉瞬渝盟包
藏不軌窺伺我斥堠搖惑我外藩潛敗我納木札爾
拖音肆虐不止朕深念此寇斷宜速滅於是整飭士
馬備峙糧糗決策親征而賊之蹤跡飄忽無常又慮

其兵至遠颺兵退復入乃授密畫於科爾沁王沙律
令其遣使誘賊約至近地旋調發盛京諸路軍禦東
路分遣一軍截西路朕躬統六師從中路入比行近
賊巢噶爾丹不敢抗我顏行聞風奔竄朕遂親率前
鋒軍併日追擊賊窮蹙已極盡棄其子女輜重而遁
會與我西路師遇大敗其軍噶爾丹僅以數人跳身
走嗣是朕再駕而至鄂爾多斯三駕而至狼居胥山
麓宣威布惠兼用互施招徠其黨羽遏絕其歸路其

寨桑等接踵嚮附其子復為我擒賊自料勢不能遁
遂爾仰藥授首所親信丹濟喇等亦相繼乞降二十
餘年狡悍陸梁之勁寇曾不二載悉皆草薶禽獮而
大業克就矣夫烈焰弗戢必將燎原積寇一日不除
則疆圉一日不靖方親征之初舉也在廷諸臣多持
異議狃於目前之計者謂兇鋒挫衄無足深憂憚於
征繕之煩者謂大漠遊魂難以就縛不知除惡務盡
制勝在謀歷觀漢唐宋之已事往往罷敝中國之力

而不能成廓清邊塞之功良由經理失宜而殲鋤之
不早也朕既遠鑒前轍復追維烏闌布通之失故不
避寒暑艱辛親泣窮邊三勤薄伐惟是逆形已著然
後徂征怙惡不悛然後摻討身先士卒則櫛風沐雨
而人皆忘勞指畫軍儲則轉饟饋師而人爭用命茂
草茁於荒磧流泉溢於沙陀萬里經行安如枕席非
徼神祐曷繇臻此易曰天之所助者順也人之所助
者信也朕仰憑天道俯愜人情以萬不得已而用兵

之意乘刻不容緩而滅寇之機立拯邊境之毒痛永
底中原於清宴昭告

郊

廟適契成謀使非慮出萬全可輕言師旅哉茲前後用
兵本末具載卷中覽是編者尚克喻朕心焉

治河方略一部

聖祖仁皇帝巡行指示河防底績恭紀

方略凡十二卷自康熙元年至六十一年治黃運兩河

諸事備紀焉附錄一卷紀八年至四十年治渾
河清河永定河三十三年至三十九年治漳河
滏河滹沱河子牙河諸事

平定金川方略一部

乾隆十四年二月金川夷酋莎羅奔面縛詣軍
門降振旅凱旋爰

允廷臣之請纂輯

方略自十一年十一月至十四年四月

廟謨勝算備載成書凡二十六卷十七年奉

旨校刊

皇上御製序 金川方略纂輯既竣諸臣以

聖祖平定朔漠方略

御製序文之例為請夫所謂方畧者非遙執事權掣其肘而矜自用千里請戰之謂也惟天子將將將將之道無他信賞必罰而已夫以一隅之不靖徵發士旅飛輓芻糧繹騷率及數省舉億兆生靈之命

委之一將而攻守失據險易弗知怠公事而棄時
日失士心而張賊勢甚或揜敗為功逋逃告捷此
而不誅時乃失罰至夫蓋臣宣力盡瘁馳驅金石
可孚豚魚斯格成勞卓越則車服以庸之旂常以
紀之稽績逮於行間執秩陳於幕府酬庸之典孰
大於是此而不疇時乃恡賞且夫天討有罪叛則
誅而服則舍兵革非快意之圖慘殺違好生之道
然非其悔禍誠切向化革心顧以姑息為包荒旋

撫旋叛蔓延益熾雖由司事者動乏成算而廟堂之無策亦已甚矣朕有鑒於大權之不容旁貸有罪不赦有功必錄既服不誅命討一出於事理之當然而實無容心焉此兩年中宵旰憂勤始終弗懈保大定功之本意而編集之不可以已也若乃指授機宜視

皇祖之親勤鑾馭固無由仰企萬一而金川夙隸職方亦非噶爾丹絕漠狡寇可同日而語要之行師者

保邦之大事爰允所請弁言以示來許

平定準噶爾方略一部

乾隆二十年五月大師平準噶爾俘達瓦齊以
獻越明年再定伊犁阿睦爾撒納伏冥誅二十
四年平回部逆酋波羅泥都霍集占獻馘

闕下西極耆定

大功告成爰

允廷臣之請纂輯

方畧分為三編自康熙三十九年至乾隆十八年為
前編凡五十四卷自乾隆十八年諸部內附至
二十四年凱旋為正編凡八十五卷平定後經
理典制諸事宜為續編凡三十二卷
睿謨鴻業具著於篇

國朝宮史卷二十五